

Vorrede auff das Newe

Testament.

Alt Testament.

New Testament

Euangelium.

Euangelium vnd
new Testament ist
ein ding.

Euangelium
durch die Prophe-
ten verheissen.

Christus des
Weibs same.
Schlangen Kopff

Christus hat alle
Welt gesegnet.



leich wie das alte Testa-

ment ist ein Buch / darinnen Gottes gesetz vnd Gebot / da neben die Geschichte / beide dere / die die selbigen gehalten vnd nicht gehalten haben / geschrieben sind. Also ist das newe Testament ein Buch / darinnen das Euangelium vnd Gottes verheissung / da neben auch Geschichte / beide dere / die daran glauben vnd nicht glauben / geschrieben sind.

Denn Euangelium ist ein Griechisch wort / vnd heisset auff Deutsch / gute Botschafft / gute Mehre / gute Newezeitung / gut Geschrey / dauon man singet / saget vnd frölich ist. Als da David den grossen Goliath vberwand / kam ein gut Geschrey vnd tröstliche Newezeitung vnter das Jüdische volck / Das jr gewaltlicher Feind erschlagen / vnd sie erlöset / zu freude vnd friede gestellet weren / Davon sie singen vnd sprungen / vnd frölich waren.

Also ist das Euangelium Gottes vnd new Testament / ein gute Mehre vnd Geschrey / in alle Welt erschollen / durch die Apostel / von einem rechten David / der mit der Sünde / Tod vnd Teufel gestritten / vnd vberwunden habe / Vnd damit alle die / so in Sünden gefangen / mit dem Tode geplaget / vom Teufel vberweldiget gewesen / Du jr verdienst / erlöset / gerecht / lebendig vnd selig gemacht hat / vnd damit zu friede gestellet / vnd Gott wider heimbracht. Davon sie singen / dancken / Gott loben vnd frölich sind ewiglich / So sie das anders feste glauben / vnd im glauben bestendig bleiben.

Solch geschrey vnd tröstliche Mehre / oder Euangelische vnd göttliche Newezeitung / heisset auch ein new Testament / darumb / Das gleich wie ein Testament ist / wenn ein sterbender Man sein Gut bescheidet / nach seinem tode den benannten Erben aus zu teilen. Also hat auch Christus vor seinem sterben befolhen vnd bescheiden / solchs Euangelium nach seinem Tode auszuruffen in alle Welt. Vnd damit allen / die da glauben / zu eigen gegeben alles sein Gut / Das ist / sein Leben / damit er den Tod verschlungen / seine Gerechtigkeit / damit er die Sünde vertilget / vnd seine Seeligkeit / damit er die ewige Verdammnis vberwunden hat. Nu kan je der arme Mensch / in Sünden / Tod vnd zur Helle verstricket / nichts tröstlicheres hören / denn solche thewre / liebliche Botschafft von Christo / Vnd mus sein hertz von grund lachen vnd frölich darüber werden / wo ers gleubet / das war sey.

Was hat Gott solchen glauben zu stercken / dieses sein Euangelium vnd Testament / vielfeltig im alten Testament / durch die Propheten verheissen / Wie S. Paulus sagt Rom. i. Ich bin ausgesondert zu predigen das Euangelium Gottes / welchs er zu vor verheissen hat durch seine Propheten / in der heiligen Schrift / von seinem Son / der im geboren ist von dem samen David etc.

Vnd das wir der etliche anzeigen / Dat ers am ersten verheissen / da er saget zu der Schlangen / Gen. iij. Ich wil Feindschafft setzen zwischen Dir vnd dem Weib / vnd zwischen deinem Samen vnd jrem Samen / Der selb sol dir den Kopff zutretten / Vnd du wirst in in die Versen stechen. Christus ist der Same dieses Weibes / der dem Teufel sein Kopff / das ist / Sünde / Tod / Helle / vnd alle seine Krafft zutretten hat / Denn on diesen Samen kan kein Mensch der Sünde / dem Tod / noch der Hellen entinnen.

Item / Gen. xxij. verhies ers Abraham / Durch deinen Samen / sollen alle Völcker auff Erden gesegnet werden. Christus ist der Same Abrahe / spricht S. Paulus Gal. iij. Der hat alle Welt gesegnet / durchs Euangelium. Denn wo Christus nicht ist / da ist noch der Fluch / der vber Adam vnd seine Kinder fiel / da er gesündigt hatte / das sie alle zumal der Sünde / des Tods / vnd der Hellen schuldig vnd eigen sein müssen. Wider den Fluch / segnet nu das Euangelium alle Welt / da mit / das es ruffet öffentlich / Wer an diesen Samen Abrahe gleubet / sol gesegnet / das ist / von Sünde / Tod vnd Helle los sein / vnd gerecht / lebendig vnd selig bleiben ewiglich. Wie Christus selbs sagt / Johan. xj. Wer an mich gleubet / der wird nimer mehr sterben.

Item / So verhies ers David ij. Sam. viij. da er saget / Ich wil erwecken deinen